

বাংলাদেশ



গেজেট

অতিরিক্ত সংখ্যা
কর্তৃপক্ষ কর্তৃক প্রকাশিত

শুক্রবার, ডিসেম্বর ৯, ২০১৬

গণপ্রজাতন্ত্রী বাংলাদেশ সরকার
বেসামরিক বিমান পরিবহন ও পর্যটন মন্ত্রণালয়
প্রজ্ঞাপন

তারিখ : ২১ অগ্রহায়ণ, ১৪২৩ বঙ্গাব্দ/০৫ ডিসেম্বর, ২০১৬ খ্রিস্টাব্দ

এস,আর,ও নং ৩৬৫-আইন/২০১৬।—বাংলাদেশ হোটেল ও রেস্টোরাঁ আইন, ২০১৪ (২০১৪ সনের ১৫ নং আইন) এর ধারা ২৪ এ প্রদত্ত ক্ষমতাবলে সরকার নিম্নরূপ বিধিমালা প্রণয়ন করিল, যথা:—

১। সংক্ষিপ্ত শিরোনাম।—এই বিধিমালা বাংলাদেশ হোটেল ও রেস্টোরাঁ বিধিমালা, ২০১৬ নামে অভিহিত হইবে।

২। সংজ্ঞা।—বিষয় বা প্রসঙ্গের পরিপন্থী কোন কিছু না থাকিলে, এই বিধিমালায়—

- (১) “আইন” অর্থ বাংলাদেশ হোটেল ও রেস্টোরাঁ আইন, ২০১৪ (২০১৪ সনের ১৫নং আইন);
- (২) “তফসিল” অর্থ এই বিধিমালার কোন তফসিল;
- (৩) “তারকামান” অর্থ আইনের ধারা ১৩ এর উদ্দেশ্য পূরণকল্পে তফসিল-১ খণ্ড (ক) এ বর্ণিত ন্যূনতম সুবিধা ও সেবা অনুযায়ী নির্ধারিত হোটেলের মানদণ্ড;
- (৪) “নিবন্ধক” অর্থ আইনের ধারা ২(৪) এ সংজ্ঞায়িত নিবন্ধক;
- (৫) “নিয়ন্ত্রক” অর্থ আইনের ধারা ৪ অনুযায়ী দায়িত্ব পালনকারী সংশ্লিষ্ট জেলা প্রশাসক এবং সরকারি গেজেটে প্রজ্ঞাপন দ্বারা নিযুক্ত পলভন কর্মকর্তা;
- (৬) “ফরম” অর্থ এই বিধিমালার কোন ফরম;
- (৭) “ব্যক্তি” অর্থ আইনের ধারা ২(৮) এ সংজ্ঞায়িত ব্যক্তি;

(১৮১১১)

মূল্য : টাকা ৪০.০০

- (৮) “মালিক” অর্থ আইনের ধারা ২(৯) এ সংজ্ঞায়িত মালিক;
- (৯) “শ্রেণিমান” অর্থ আইনের ধারা ১৩ এর উদ্দেশ্য পূরণকল্পে তফসিল-১ খণ্ড (খ) এ বর্ণিত সুবিধা ও সেবা অনুযায়ী নির্ধারিত রেস্তোরাঁর মানদণ্ড;
- (১০) “সেবা” অর্থ আইনের ধারা ২(১২) এ সংজ্ঞায়িত সেবা;
- (১১) “রেস্তোরাঁ” অর্থ আইনের ধারা ২(১০) এ সংজ্ঞায়িত রেস্তোরাঁ; এবং
- (১২) “হোটেল” অর্থ আইনের ধারা ২(১৩) এ সংজ্ঞায়িত হোটেল।

৩। হোটেল ও রেস্তোরাঁ নিবন্ধন।—(১) হোটেল বা রেস্তোরাঁ নিবন্ধন করিবার ক্ষেত্রে আবেদনকারী কর্তৃক ফরম-১ অনুযায়ী সংশ্লিষ্ট নিবন্ধক বরাবর, নিম্নলিখিত কাগজাদিসহ আবেদন করিতে হইবে, যথা :—

(ক) নিজ জমিতে হোটেল বা রেস্তোরাঁ নির্মাণের ক্ষেত্রে—

- (অ) সংশ্লিষ্ট জমির মালিকানার মূল দলিল বা নামজারীর সত্যায়িত কপি;
- (আ) যথাযথ কর্তৃপক্ষ কর্তৃক ভবন নির্মাণের অনুমোদন ও শর্তপূরণ সংক্রান্ত দলিলাদির সত্যায়িত কপি;
- (ই) পূর্ণাঙ্গ কাঠামোগত প্লান (Detailed Structural Plan), নকশা ও সুবিধাদির বিবরণ সংক্রান্ত দলিলাদির সত্যায়িত কপি;
- (ঈ) ট্রেড লাইসেন্স এবং TIN সনদের সত্যায়িত কপি; এবং
- (উ) ১-৫৩০১-০০০১-১৮১৭ নম্বর কোডে ট্রেজারী চালানের মাধ্যমে তফসিল-২ এ উল্লিখিত আবেদন ফি জমার ট্রেজারী চালানের মূল কপি; এবং

(খ) ভাড়া না ইজারাকৃত ভবন বা জমিতে হোটেল বা রেস্তোরাঁ নির্মাণের ক্ষেত্রে—

- (অ) দীর্ঘমেয়াদী ভাড়া অথবা ইজারা চুক্তির সত্যায়িত কপি;
- (আ) ট্রেড লাইসেন্স এবং TIN সনদের সত্যায়িত কপি; এবং
- (ই) ১-৫৩০১-০০০১-১৮১৭ নম্বর কোডে ট্রেজারী চালানের মাধ্যমে তফসিল-২ এ উল্লিখিত আবেদন ফি জমার ট্রেজারী চালানের মূল কপি।

(২) নিবন্ধক উপ-বিধি (১) এর অধীন আবেদন প্রাপ্তির ৩০(ত্রিশ) কার্য দিবসের মধ্যে আবেদনকারী কর্তৃক দাখিলকৃত দলিলাদি পরীক্ষা-নিরীক্ষাক্রমে উহার সঠিকতা সম্পর্কে নিশ্চিত হইলে তফসিল-২ এ উল্লিখিত নিবন্ধন ফি জমা প্রদানের জন্য আবেদনকারী বরাবর দাবীপত্র ইস্যু করিবেন।

(৩) উপ-বিধি (২) অনুযায়ী দাবীপত্র প্রাপ্তির পর আবেদনকারী ১-৫৩০১-০০০১-১৮১৭ নম্বর কোডে ট্রেজারী চালানের মাধ্যমে তফসিল-২ এ উল্লিখিত নিবন্ধন ফি জমা প্রদান করিয়া উহার মূলকপি নিবন্ধক বরাবর দাখিল করিবেন।

(৪) উপ-বিধি (৩) এ উল্লিখিত ট্রেজারী চালানের মূল কপি দাখিলের ১৫ (পনের) কার্য দিবসের মধ্যে নিবন্ধক ফরম-৯ অনুযায়ী সংশ্লিষ্ট আবেদনকারীর অনুকূলে নিবন্ধন সনদ ইস্যু করিবেন।

৪। লাইসেন্সের জন্য আবেদন।—(১) তফসিল-১ এ উল্লিখিত বিভিন্ন শ্রেণির রেস্তোরাঁ বা বিভিন্ন তারকামানের হোটেলের লাইসেন্সের জন্য ফরম-৩ অনুযায়ী নিম্নবর্ণিত কাগজাদিসহ সংশ্লিষ্ট নিয়ন্ত্রক বরাবর আবেদন করিতে হইবে, যথা :—

- (ক) নিবন্ধন সনদের সত্যায়িত কপি;
- (খ) ১-৫৩০১-০০০১-১৮১৮ নম্বর কোডে ট্রেজারী চালানের মাধ্যমে তফসিল-২ এ উল্লিখিত লাইসেন্স ফি প্রদানের কপি; এবং
- (গ) আইনের ধারা ১১ এ উল্লিখিত যোগ্যতা এবং এই বিধিমালার অধীন বর্ণিত সকল শর্ত পূরণ হইয়াছে মর্মে ৩০০/- (তিনশত) টাকার নন জুডিশিয়াল স্ট্যাম্প আবেদনকারী কর্তৃক সম্পাদিত অঙ্গীকারনামা;
- (ঘ) তিন বা তদূর্ধ্ব তারকামানের হোটেলের ভবন নির্মাণের ক্ষেত্রে ভবন নির্মাণের কাজ শুরু করিবার পূর্বে সরকার কর্তৃক প্রদত্ত ছাড়পত্রের সত্যায়িত কপি;
- (ঙ) হোটেল ভবন ব্যবহার (অকুপেন্সি) ও ভবনে সরবরাহকৃত সকল সেবার (ইউটিলিটি) নিরাপত্তা সংক্রান্ত বিষয়ে সংশ্লিষ্ট কর্তৃপক্ষ কর্তৃক প্রদত্ত সনদ; এবং
- (চ) ফরম-৭ অনুযায়ী সিভিল সার্জন বা সরকার অনুমোদিত কোন মেডিকেল কলেজ হাসপাতালের চিকিৎসক কর্তৃক হোটেল কর্মকর্তা ও কর্মচারীদের স্বাস্থ্যগত প্রতিবেদন বা সনদ।

(২) উপ-বিধি (১) অনুযায়ী আবেদনপত্র দাখিলের ১৫ (পনের) কার্য দিবসের মধ্যে নিয়ন্ত্রক ফরম-২ অনুযায়ী সংশ্লিষ্ট আবেদনকারীর অনুকূলে লাইসেন্স ইস্যু করিবেন।

৫। লাইসেন্স নবায়ন, বিলম্ব ফি, ইত্যাদি।—(১) কোন হোটেল বা রেস্তোরাঁর লাইসেন্সের মেয়াদ উত্তীর্ণ হইবার অনূন্য ৩ (তিন) মাস পূর্বে ফরম-৪ এ উল্লিখিত নমুনা অনুযায়ী নিম্নবর্ণিত দলিলাদিসহ সংশ্লিষ্ট নিয়ন্ত্রক বরাবর লাইসেন্স নবায়নের জন্য আবেদন করিতে হইবে, যথা:—

- (ক) তফসিল-২ অনুযায়ী লাইসেন্স নবায়ন ফি ট্রেজারী চালানের মাধ্যমে ১-৫৩০১-০০০১-১৮১৮ নম্বর কোডে জমা প্রদানের মূল কপি;
- (খ) বিগত অর্থ বৎসরের আয়কর প্রদান সংক্রান্ত প্রত্যয়নপত্র, প্রযোজ্য ক্ষেত্রে, নিরীক্ষা প্রতিবেদন; এবং
- (গ) ফরম-৭ অনুযায়ী সিভিল সার্জন বা সরকার অনুমোদিত কোন মেডিকেল কলেজ হাসপাতালের চিকিৎসক কর্তৃক হোটেল কর্মকর্তা ও কর্মচারীদের স্বাস্থ্যগত প্রতিবেদন বা সনদ।

(২) উপ-বিধি (১) এর অধীন আবেদনপত্র প্রাপ্তির ৩০ (ত্রিশ) কার্য দিবসের মধ্যে উহা পরীক্ষা-নিরীক্ষাক্রমে সংশ্লিষ্ট নিয়ন্ত্রক—

- (ক) সন্তুষ্ট হইলে, লাইসেন্স নবায়নের আবেদন মঞ্জুর করিবেন, অথবা
- (খ) সন্তুষ্ট না হইলে, কারণ লিপিবদ্ধ করিয়া আবেদন নামঞ্জুর করিবেন এবং উক্তরূপ নামঞ্জুরের বিষয়টি সংশ্লিষ্ট আবেদনকারীকে অবহিত করিবেন।

(৩) উপ-বিধি (১) এ উল্লিখিত সময়ের মধ্যে কোন হোটেল বা রেস্তোরাঁর মালিক লাইসেন্স নবায়নের আবেদন করিতে ব্যর্থ হইলে, মেয়াদ উত্তীর্ণ হইবার পূর্বে উহা নবায়নের জন্য উক্ত ৩ (তিন) মাসের মধ্যে প্রতি মাসের জন্য ৪% (চার শতাংশ) হারে বিলম্ব ফি প্রদানপূর্বক আবেদন করা যাইবে।

(৪) উপ-বিধি (৩) এ উল্লিখিত সময়ের মধ্যে বিলম্ব ফি প্রদানপূর্বক লাইসেন্স নবায়নের আবেদন করিতে ব্যর্থ হইলে উক্ত লাইসেন্স স্বয়ংক্রিয়ভাবে বাতিল হইবে।

৬। ডুপ্লিকেট লাইসেন্স ইস্যু।—(১) লাইসেন্স হারাইয়া, পুড়িয়া বা বিনষ্ট হইয়া গেলে সংশ্লিষ্ট হোটেল বা রেস্তোরাঁর মালিক সংশ্লিষ্ট থানায় সাধারণ ডায়েরী দায়েরপূর্বক উহার কপি এবং তফসিল-২ এ উল্লিখিত ডুপ্লিকেট লাইসেন্স ফিসহ ফরম-৫ অনুযায়ী নিয়ন্ত্রক বরাবর ডুপ্লিকেট লাইসেন্সের জন্য আবেদন করিতে পারিবেন।

(২) সংশ্লিষ্ট নিয়ন্ত্রক উপ-বিধি (১) এর অধীন আবেদন প্রাপ্তির পর উহার সঠিকতা যাচাই-বাছাইপূর্বক অনধিক ১৫ (পনের) কার্য দিবসের মধ্যে ফরম-৮ অনুযায়ী ডুপ্লিকেট লাইসেন্স ইস্যু করিবেন।

৭। হোটেলের তারকামান ও রেস্তোরাঁর শ্রেণিমান।—(১) আইনের ধারা ১৩ এর উদ্দেশ্য পূরণকল্পে তফসিল-১ অনুযায়ী হোটেলের তারকামান, রেস্তোরাঁর শ্রেণিমান এবং সংশ্লিষ্ট হোটেল বা রেস্তোরাঁ কতৃক প্রদত্ত সুবিধা ও সেবার মানদণ্ড নির্ধারিত হইবে।

(২) কোন মালিক হোটেলের তারকামান বা রেস্তোরাঁর শ্রেণিমান উন্নীত করিবার জন্য আবেদন করিলে সংশ্লিষ্ট নিয়ন্ত্রক সরেজমিনে তদন্তপূর্বক সন্তুষ্ট হইলে, উপ-বিধি (১) এর বিধান সাপেক্ষে, আবেদনে চাহিত তারকামান বা শ্রেণিমান বৃদ্ধির আদেশ প্রদান করিবেন।

৮। হোটেল বা রেস্তোরাঁর নূতন লাইসেন্স গ্রহণ, ইত্যাদি।—(১) হোটেল বা রেস্তোরাঁর মালিকানা হস্তান্তরের ফলে কোন ব্যক্তিকে নূতন লাইসেন্স গ্রহণ করিবার ক্ষেত্রে বিধি ৩ এবং ৪ এ বর্ণিত বিধান অনুসরণক্রমে তফসিল ২ এ বর্ণিত মালিকানাশ্রুত হস্তান্তর ফি প্রদানপূর্বক নিয়ন্ত্রক বরাবর নিবন্ধনের জন্য আবেদন করিতে হইবে।

(২) উপ-বিধি (১) এর অধীন আবেদনপত্র প্রাপ্তির ৩০ (ত্রিশ) কার্য দিবসের মধ্যে সংশ্লিষ্ট নিয়ন্ত্রক উহা পরীক্ষা-নিরীক্ষাক্রমে—

(ক) সন্তুষ্ট হইলে, সংশ্লিষ্ট হোটেল বা রেস্তোরাঁ পরিচালনার জন্য নিবন্ধনের আবেদন মঞ্জুর করিবেন; অথবা

(খ) সন্তুষ্ট না হইলে, কারণ লিপিবদ্ধ করিয়া আবেদন নামঞ্জুর করিবেন এবং উক্তরূপ নামঞ্জুরের বিষয়টি সংশ্লিষ্ট আবেদনকারীকে অবহিত করিবেন।

৯। হোটেল বা রেস্তোরাঁর নাম পরিবর্তন।—(১) লাইসেন্সপ্রাপ্ত কোন হোটেল বা রেস্তোরাঁর নাম পরিবর্তন করিতে চাহিলে সংশ্লিষ্ট হোটেল বা রেস্তোরাঁর মালিককে তফসিল ২ এ উল্লিখিত নির্ধারিত নাম পরিবর্তন ফি প্রদানপূর্বক ফরম-৬ অনুযায়ী নিয়ন্ত্রকের নিকট আবেদন করিতে হইবে।

(২) উপ-বিধি (১) এর অধীন আবেদনপত্র প্রাপ্তির ৩০ (ত্রিশ) কার্য দিবসের মধ্যে উহা পরীক্ষা-নিরীক্ষাক্রমে সংশ্লিষ্ট নিয়ন্ত্রক—

(ক) সন্তুষ্ট হইলে, সংশ্লিষ্ট হোটেল বা রেস্তোরাঁর নাম পরিবর্তনের আবেদন মঞ্জুর করিবেন; অথবা

(খ) সন্তুষ্ট না হইলে, কারণ লিপিবদ্ধ করিয়া আবেদন নামঞ্জুর করিবেন এবং উক্তরূপ নামঞ্জুরের বিষয়টি সংশ্লিষ্ট আবেদনকারীকে অবহিত করিবেন।

১০। ন্যায্যদর।—(১) প্রতিটি হোটেল ও রেস্তোরাঁ কর্তৃক আবাসন, খাদ্য, পানীয় বা অন্যান্য সেবার জন্য ন্যায্যদর স্থানীয় মুদ্রায় নির্ধারণ করিতে হইবে এবং উহা মুদ্রিত আকারে হোটেল বা রেস্তোরাঁর প্রকাশ্য স্থানে প্রদর্শন করিতে হইবে।

(২) অতিথি বা ক্রেতা স্থানীয় মুদ্রায় পণ্য ও সেবার মূল্য পরিশোধ করিবে, তবে বিশেষ অবস্থায় বৈদেশিক মুদ্রায় (ইউএস ডলারে) মূল্য পরিশোধ করা যাইবে।

১১। পরিদর্শন ও অতিথি নিবন্ধন রেজিস্টার।—(১) নিবন্ধক বা নিয়ন্ত্রক কর্তৃক পরিদর্শনের জন্য প্রত্যেক হোটেল ও রেস্তোরাঁয় একটি পরিদর্শন রেজিস্টার থাকিবে।

(২) প্রত্যেক হোটলে একটি অতিথি নিবন্ধন রেজিস্টার থাকিবে যাহাতে অতিথির নাম, আগমন ও প্রস্থানের সময় ও তারিখ, স্থায়ী ও বর্তমান ঠিকানা এবং মোবাইল নম্বর, জাতীয় পরিচয়পত্র বা পাসপোর্ট বা অন্য কোন পরিচয়সূচক প্রমাণপত্রসহ (যদি থাকে) প্রয়োজনীয় অন্যান্য তথ্য লিপিবদ্ধ করিতে হইবে :

তবে শর্ত থাকে যে, বিদেশি নাগরিকের ক্ষেত্রে পাসপোর্টের ছবি, নাম, ঠিকানা ও ভিসা সম্বলিত পৃষ্ঠার ফটোকপি সংরক্ষণ করিতে হইবে।

১২। অতিথি বা ক্রেতার অভিযোগ নিষ্পত্তি।—আইনের ধারা ১৬ এর উপ-ধারা (৩) এর অধীন কোন ক্রেতা বা অতিথি নিয়ন্ত্রকের নিকট অভিযোগ করিলে তিনি অভিযোগ প্রাপ্তির পর যথাশীঘ্র, প্রয়োজনে সরেজমিনে তদন্তপূর্বক, উভয় পক্ষের বক্তব্য বা শুনানি গ্রহণ করিয়া লিখিতভাবে যথাযথ আদেশ প্রদান করিবেন।

১৩। পরিদর্শন ও তদন্ত পদ্ধতি।—হোটেল বা রেস্তোরাঁর সুবিধা ও সেবার মান নিয়ন্ত্রণের জন্য সংশ্লিষ্ট নিয়ন্ত্রক তফসিল-৩ এ উল্লিখিত পরিদর্শন ফরম অনুযায়ী হোটেল বা রেস্তোরাঁ নিয়মিত পরিদর্শন এবং, প্রয়োজনে, তদন্ত করিতে পারিবেন।

১৪। নিবন্ধন সনদ বা লাইসেন্স বাতিলের পূর্বে নোটিশ প্রদান।—(১) আইনের ধারা ১৭ এর উপ-ধারা (১) এ বর্ণিত কারণে নিবন্ধন সনদ বা লাইসেন্স স্থগিত বা বাতিল করিবার পূর্বে হোটেল বা রেস্তোরাঁর মালিককে ১৫ (পনের) কার্যদিবসের মধ্যে কারণ দর্শানোর নোটিশ প্রদান করিতে হইবে।

(২) কোন হোটেল বা রেস্তোরাঁর মালিক উপ-বিধি (১) এ উল্লিখিত সময়সীমার মধ্যে কারণ দর্শাইতে ব্যর্থ হইলে তিনি যথাযথ কারণ উল্লেখপূর্বক উক্ত সময়সীমা বৃদ্ধির জন্য আবেদন করিতে পারিবেন।

(৩) উপ-বিধি (২) এর অধীন আবেদন প্রাপ্তির পর নিবন্ধক বা, ক্ষেত্রমত, নিয়ন্ত্রক উহা যাচাই-বাছাইক্রমে সন্তুষ্ট হইলে অনধিক ৭ (সাত) কার্যদিবস সময় বৃদ্ধি করা যাইবে এবং উক্ত সময়ের মধ্যে শুনানী সম্পন্ন করিতে হইবে।

১৫। হোটেল বা রেস্তোরাঁর পরিচালনা নির্দেশিকা।—(১) প্রতিটি হোটেল বা রেস্তোরাঁর মালিক এই বিধিমালার সহিত সামঞ্জস্য রাখিয়া নিজ নিজ হোটেল বা রেস্তোরাঁ সুষ্ঠুভাবে পরিচালনা ও ব্যবস্থাপনার জন্য সংশ্লিষ্ট হোটেল বা রেস্তোরাঁ পরিচালনা নির্দেশিকা প্রণয়নপূর্বক লাইসেন্স প্রাপ্তির পরবর্তী ৬ (ছয়) মাসের মধ্যে নিয়ন্ত্রকের নিকট হইতে উহার অনুমোদন গ্রহণ করিবেন।

(২) পরিচালনা নির্দেশিকায় নিম্নবর্ণিত বিষয়সমূহ থাকিতে হইবে, যথা :—

- (ক) কর্মকর্তা-কর্মচারীদের নিয়োগ, বেতন-ভাতাদি, আচরণ নিয়ন্ত্রণ, চাকুরী পরিকল্পনা, প্রশিক্ষণ, অবসর, সিভিল সার্জন বা সরকার অনুমোদিত কোন মেডিকেল কলেজ হাসপাতালের চিকিৎসক কর্তৃক স্বাস্থ্যগত যোগ্যতা পরীক্ষা বা অনুরূপ বিষয়াদি;
- (খ) হোটেল বা রেস্তোরাঁর অতিথি বা ক্রেতাবৃন্দের আবাসন, আহার, পানীয়, চিকিৎসা বা অনুরূপ ক্ষেত্রে প্রদেয় সুবিধা ও ন্যায্যদর;
- (গ) অতিথি নিবন্ধন রেজিস্টারসহ প্রয়োজনীয় অন্যান্য রেজিস্টার সংরক্ষণ;
- (ঘ) ওয়াই-ফাই (Wi-fi) সহ ইন্টারনেট সুবিধা, নিরাপত্তা ব্যবস্থা, পরিবহন, টেলিফোন বা অনুরূপ সুবিধা সংক্রান্ত তথ্য;
- (ঙ) ক্রেডিট পলিসি, বকেয়া আদায় পদ্ধতি সংক্রান্ত বিষয়াদি;
- (চ) নিয়ন্ত্রক কর্তৃক সময় সময় নির্দেশিত বিষয়াদি; এবং
- (ছ) হোটেল রেস্তোরাঁর প্রদত্ত অন্যান্য সুবিধাদি, যদি থাকে।

(৩) হোটেল বা রেস্তোরাঁর পরিচালনা নির্দেশিকা সংশোধনের প্রয়োজন হইলে সংশ্লিষ্ট সংশোধনী প্রস্তাব নিয়ন্ত্রকের নিকট দাখিল করিতে হইবে।

(৪) সংশ্লিষ্ট নিয়ন্ত্রক উপ-বিধি (৩) অনুযায়ী প্রস্তাব প্রাপ্তির ৩০ (ত্রিশ) কার্য দিবসের মধ্যে প্রাপ্ত প্রস্তাব যাচাই-বাছাইক্রমে প্রয়োজনে, পরিবর্তন বা সংশোধনপূর্ব, অনুমোদন করিবেন।

১৬। নিবন্ধন সনদ ও লাইসেন্স এর তথ্য সংরক্ষণ ও প্রদর্শন, ইত্যাদি।—(১) প্রতিটি নিবন্ধন সনদ এবং লাইসেন্সের বিস্তারিত তথ্য যথাক্রমে সংশ্লিষ্ট নিবন্ধক ও নিয়ন্ত্রকের দপ্তরে ডাটাবেজ আকারে সংরক্ষণ করিতে হইবে।

(২) একই নিয়ন্ত্রকের অধিক্ষেত্রাধীন কোন ব্যক্তি বা প্রতিষ্ঠান কর্তৃক পরিচালিত কোন হোটেল বা রেস্তোরাঁ অন্য কোন ব্যক্তি বা প্রতিষ্ঠান কর্তৃক একই নামে পরিচালনা করিতে পারিবেন না।

(৩) হোটেল বা রেস্তোরাঁ কর্তৃপক্ষ নিয়ন্ত্রক কর্তৃক প্রদত্ত লাইসেন্সটি সর্বসাধারণের দৃষ্টিগোচর হয়, এমন স্থানে প্রদর্শন করিবে।

১৭। রহিতকরণ ও হেফাজত।—(১) Bangladesh Hotels and Restaurants (Registrations, Licence and Control) Rules, 1986, অতঃপর উক্ত Rules বলিয়া উল্লিখিত, এতদ্বারা রহিত করা হইল।

(২) উপ-বিধি (১) এর অধীন রহিতকরণ সত্ত্বেও, উক্ত Rules এর অধীন কৃত কার্যক্রম, গৃহীত ব্যবস্থা বা প্রদত্ত আদেশ এই বিধিমালার অধীন কৃত, গৃহীত বা প্রদত্ত হইয়াছে বলিয়া গণ্য হইবে এবং কোন কার্যক্রম চলমান থাকিলে উহা এমনভাবে নিষ্পত্তি করিতে হইবে যেন উক্ত Rules রহিত হয় নাই।

